

# gwionhallam



**Dyddiad Geni** 9 Awst 1973

**Ble cawsoch chi eich geni a'ch magu?**

Cefais fy ngeni yn Abertawe a'm magu yn Rhydaman.

**Ble rydych chi'n byw nawr?**

Ar Ian y Fenai, yn y Felinheli.

**Beth yw eich gwaith?**

Sgwennwr.

**Ble cawsoch chi eich addysg?**

Ysgol Gynradd Gymraeg Rhydaman, Ysgol Uwchradd Maes yr Yrfa, Coleg Prifysgol Cymru Aberystwyth.

**Beth roeddech chi'n ei hoffi neu'n ei gasáu am yr ysgol?**

Hoff iawn o actio ac actio'r ffŵl, tynnu ar yr athrawon, gwersi cerdd, *pasties* siop Julie, chwarae *covers* o ganeuon yr Anhrefn mewn band gwael, ac yfed coffi wrth wrando ar gerddoriaeth yn ystafell y Chweched (Blynyddoedd 12/13). Hoff wersi – drama, a gwersi Saesneg pan fyddai Miss Wilkins yn darllen nofelau cyfan i ni. Dwi ddim yn cofio casáu unrhywbeth mewn gwirionedd.

**Beth oedd eich hoff lyfr pan yn blentyn?**

*Barti Ddu* gan T. Llew Jones, *Beibl y Plant*, a *The Hobbit* gan Tolkien.

**Beth yw eich hoff ddiddordebau?**

Darllen, ffilmiau, lawrlwytho a gwranddo ar gerddoriaeth, beicio, mynd ar wyliau, yfed coffi, bwyta, gweiddi ar y plant a chwarae gyda nhw, mynd i nosweithiau darllen a *stand up*.

**Beth sy'n eich gwneud chi'n hapus?**

Noa a Moi (fy mhlant).

**Beth sy'n eich gwylltio chi?**

Noa a Moi.

**Pryd ddechreusoch chi feddwl am ysgrifennu?**

Dwi wedi ysgrifennu straeon a cherddi er pan o'n i'n ifanc iawn! Ond o ran ei fod yn brif waith i mi hefyd, ers rhyw bum mlynedd.

**Ydych chi'n ei chael hi'n hawdd i ysgrifennu?**

Nac ydw. Ydw. Weithiau. Hawdd ysgrifennu'n felodramatig a blodeuog ac ystrydebol. Anodd bod yn gynnil ac yn wreiddiol.

**O ble ydych chi'n cael eich syniadau?**

O unrhyw le heblaw y dudalen 'Word' wag ar y sgrin fel arfer. Daw'r syniadau gorau, gan amlaf, pan na fydda i'n ysgrifennu o flaen y sgrin. Daeth y prif syniad ar gyfer *Creadyn* – o fachgen yn cael ei gnoi gan ddraenog 'radioactive' – tra o'n i'n eistedd yn yr ardd yn siarad â ffrind a sylwi ar ddraenog yn cerdded heibio. Petai un o

lewod y Felinheli wedi cerdded heibio, fe fyddai hi'n nofel wahanol iawn!

**Ydych chi'n teimlo ei bod yn bwysig i ysgrifennu mewn dull cyfoes i apelio at gynulleidfa ifanc?**

Os mai adrodd y stori yw'r prif bwrpas, mae'n hanfodol nad yw'r iaith a'r dull o sgwennu'n amharu ar y naratif. Yn achos *Creadyn* felly, oedd, mi roedd hi'n bwysig bod yr arddull yn gyfoes a darllenadwy. Dyna oedd fy mwriad, beth bynnag.

**Oes ganddoch chi gyngor i rywun sy'n trio ysgrifennu?**

Triwch yn galetach. Ond mwynhewch a dweud y gwir am y byd a'i bobl, fel y gwelwch chi bethau.

**Oes llyfr arall gyda chi ar y gweill ar hyn o bryd?**

Dwi wedi dechrau ysgrifennu nodiadau a syniadau am ddilyniant i *Creadyn*. Y teitl yn fy mhen ar hyn o bryd ydi *Crafangau'r Creadynnod*.

**Beth sy'n gwneud i chi chwerthin?**

Rhannu swyddfa gyda Dewi – gormod o chwerthin a dim digon o sgwennu! Eleri a'r plant – dim ond trwy chwerthin mae Eleri'n gallu diodde byw gyda fi! Nosweithiau *stand up* 4 a 6 yn y Blac Boi yng Nghaernarfon.


# Adnabod Gwion a'i nofel Creadyn

## Y gwahaniaethau rhwng y Creadyn a'r Awdur:

- Mae Huw Dafis y Creadyn wedi symud i fyw o'r gogledd i'r de tra mod i wedi gwneud y gwrthwyneb.
- Mae Huw Dafis yn byw gyda'i dad a Blac Belt, ei gath fach wyllt.
- Dwi'n byw gydag Eleri, a Noa a Moi ein meibion bach ... gwych!
- Yn sgil cael ei gnoi gan ddraenog 'radioactive' mae Huw Dafis yn gwylltio ac yn trawsnewid yn greadur gwallgo. Yn sgil cael fy nghnoi gan y bÿg sgrifennu 'ma, dwi wedi trawsnewid yn awdur straeon gwallgo sy'n cael eu darllen gan bobl sydd o bosib mor wallgo â fi!
- Mae Huw Dafis yn breuddwydio am garu'r ferch ryfeddaf a welodd erioed – Katrin Kidd â'i gwallt du a'i iaith liwgar a thatw ar ei llaw. Dwi'n breuddwydio am ysgrifennu'r nofel ryfeddaf a sgwennaf i fyth – *Crafangau'r Creadynnod* – hefo'i stori ddu a'i iaith liwgar sy'n gafael fel tatw ar eich llaw.
- Mae Huw Dafis yn ennill ffrind yn y diwedd, yn cael y gorau ar Lee Wheelan, a'i stori'n

ennill gwobr Tir na n-Og! Ond dwi'n colli bob dim – fy nhymer, fy mhwyll, a dwi erioed wedi ennill y loteri. Ond cofiwch, dwi erioed wedi trio chwaith!

- Mae gwallt sbeici fel draenog gan Huw. Pen moel fel bêcd bin sy gyda fi.
- Mae Huw'n chwarae rygbi yn wael, tra mod i'n chwarae Scrabble – yn waeth!
- Mae Huw Dafis yn freuddwydiwr a dw innau'n freuddwydiwr hefyd – dyna i chi debygrwydd o'r diwedd – ac mae'n dannedd ni'n rhyfedd o hir!



Enillodd Gwion Hallam wobwr Tir na n-Og\* yn 2006 am ei nofel Creadyn.



CYNGOR LLYFRAU CYMRU  
WELSH BOOKS COUNCIL

gwales.com  
LLYFRAU AR LEIN BOOKS ONLINE

\*Noddir y gwobrau gan Gyngor Llyfrau Cymru a CILIP Cymru